



## NOTAT TIL KOMMUNESTYRET, MØTE 25.06.2020

Gjeld: Oppfølging av formannskapet sitt vedtak sak 067/20, møte 11.06.2020

Er det mogleg å gje tilbod om Open hall innanfor perioden 27. juli til skulestart?

Rådmannen har vurdert problemstillinga etter:

- Kommunen sitt ansvar for smittevern og smittesporing.
- Kommunen sin kapasitet til å vere arrangementsansvarleg.

---

### FO- 067/20 Vedtak:

Vedtaket skal førebyggje og avgrense smitte, beskytte sårbare grupper og oppretthalde nødvendig kapasitet i kommunen sine helsetenester.

Kommunale bygg og aktivitetar

- Alle kommunale idrettshallar vert opna for utleige frå mandag 27. juli 2020. Formannskapet bed rådmannen leggja fram ei vurdering til kommunestyremøtet 25. juni om det vil vera mogleg å gje tilbod om Open hall innanfor perioden 27. juli til skulestart.
- Alle andre kommunale bygg, garderobeanlegg og svømmehallar skal vere stengd for utleige fram til 20. august 2020
- Utandørs idrettsanlegg kan vere opne for aktivitet i samsvar med nasjonale smittevernreglar.
- Alver kommune kontaktar Nav for å orientera om aktivitetstilbod retta mot born og unge sommaren 2020. Mål er å dela kunnskap om dei aktivitetar ein kan delta i i løpet av sommaren.

---

### 1. Kva er Open hall?

Open hall er ei nemning på ålmenne og eigenorganiserte aktivitetstilbod i idrettshallar, der vi innafør gode rammer legg til rette for at barn og unge kan nytte seg av hallane til fysisk aktivitet og leik. Open hall-tilboda har ein viktig funksjon som

sosial møteplass på fritida utanfor organisert aktivitet, og særleg i skuleferiar. Barn og unge kan fritt komme og gå når dei vil, og benytte seg av fasilitetane. I hallane legg hallvertar eller aktivitetsleiarar til rette med til dømes matter, tjukkasar, ballar, hoppeslott, sumodraktar og boblefotball, med lokale variasjonar. Dette utstyret står til fri disposisjon for dei besøkande.

Gjennomsnittleg besøkstal i Open hall er kring 300 på ein dag, men det er ikkje uvanleg med opp til 600 besøkande. Det er normalt ingen påmelding.

I Alver har tilboda i større grad retta seg mot ungdom i skuleferiar, men og med stort innrykk av mindre barn. I gamle Lindås fann Open hall stad kvar dag i haust- og vinterferiane, og i sommarveke uttanfor fellesferien. Dette var i regi av Nordhordland ballklubb i Nordhordlandshallen, mot kompensasjon, og Lindås IL i Lindåshallen. Knarvik IL hadde gjennom året Open hall på fredagar i Nordhordlandshallen. Utstyret er kjøpt inn både av laga og kommunen.

I gamle Radøy vart Radøyhallen generelt nytta mykje av ungdomsklubben, og Open hall vart arrangert i skuleferiar i regi av klubbleiarar frå Radøy ungdomsklubb og frivillige. Tilbodet vart ikkje arrangert kvar dag i desse feriane, men på utvalde dagar. Utstyret var kjøpt inn av ungdomsklubben.

Tilsvarende laga UNG Meland til Open hall i Meland Aktiv nokre dagar i skuleferiar, i regi av klubbarbeidarane på ungdomsklubben på Frekhaug og frivillige. Utstyret var kjøpt inn av ungdomsklubben og frivilligsentralen.

I Alver er Open hall slik det var i Lindås, ikkje finansiert. Tilbodet er likevel tatt i vare ved at dei fem ungdomsklubbane har rigga seg for open hall-tilbod i skuleferiar i samarbeid med lag og organisasjonar: Nordhordlandshallen, Lindåshallen, Radøyhallen og Meland Aktiv. Dette tilbodet vil i skuleferiar gi eit Open hall-tilbod tilnærma kvar dag, på rundgang mellom hallane, og stå i direkte samanheng med andre aktivitetstilbod og normal klubbdrift rundt i kommunen.

Under normale forhold ser vaktmeistrane til lokala med Open hall med jamne intervallar i løpet av dei vekene hallane er opne. Normalt reinhald har vore utført kvar dag.

## **2. Vurdering av smittevernreglar for aktivitet og kommunen sitt ansvar**

Bedriftshelsetenesta AktiMed er beden om å gjere ei vurdering av smitterisiko knytt til Open hall. Vurderinga og ROS - analysen ligg ved dette notatet i heilskap.

Konklusjonen frå AktiMed er:

«Åpen hall (uorganisert trening/aktivitet) frarådes på det nåværende tidspunkt (24.06.20). Dette er i tråd med anbefalinger fra norske helsemyndigheter.

Det vil være for mye usikkerhet rundt antall personer tilstede, tilstedeværelse av personer fra utbruddsområder, risikogrupper og annet.»

I vedlegget går det fram kva for vurderingar som er gjort, basert på gjeldande regelverk.

### **3. Vurdering av arrangementteknisk kapasitet**

Arrangementsteknisk ser vi ikkje at det er forsvarleg å gjennomføre Open hall som følgje av dei omfattande smittevernomsyna som må takast.

#### **3.1 Tal på deltakarar**

Ved gjennomføring av offentlege arrangement er det no tillate med opp til 200 deltakarar, dersom 1-metersgrensa kan oppretthaldast. Det er varsla at arrangement med opp til 500 deltakarar tidlegast kan gjennomførast etter 1. september 2020. Formuleringa i rettleiaren er uklar om grensa gjeld 200 personar per arrangement, eller 200 til ei kvar tid. Helsedirektoratet sette stopp for gjennomføring av framsyningar i Kristiansand dyrepark med fleire adskilde grupper på 200 deltakarar til stades. Det vert derfor vurdert at grensa på 200 har som intensjon å leggje avgrensingar på deltakingar i løpet av heile arrangementet.

Retningslinjene peiker elles til grupper på 20 når det gjeld organisert trening for personar under 20 år. Det er tillate med fleire grupper på 20 til ei kvar tid, dersom treningsarealet tillet dette. Desse gruppene bør haldast til deltakarar som elles samlast i andre samanhengar, og gjerne til ulike tidspunkt.

Den samla arrangementstekniske vurderinga er at Open hall berre kan gjennomførast med 2-3 grupper på 20 personar til ei kvar tid, opp til 200 i løpet av ein opningsdag. Desse må registrerast ved ankomst, og helst samlast etter skulekrins.

#### **3.2 Avstand**

Vi vurderer at Open hall ikkje oppfyller krava knytt til unntak for 1-metersregelen.

1-meters grensa gjeld ikkje for personar under 20 år, som deltek på ulike organiserte fritids- og ferietilbod, eller under organisert idrettstrening. Når det gjeld Open hall vurderer vi dette til å vere ein hybrid mellom organisert og eigenorganisert aktivitet. Rammene for tilbodet er organisert, men sjølv gjennomføringa av aktiviteten står

barn og unge fritt for sjølve. Felles for unntaka frå 1-metersregelen er at dei gjeld deltakarar og utøvarar, men ikkje for publikum. Utan påmelding for deltaking, er brukarane av tilbodet i eit grenseland for om dei er deltakar eller publikum.

### **3.3 Reinhold**

Vidare er det krav til reingjering av felles utstyr mellom aktivitetane. Dette er svært komplekst. Krava til smittevern medfører at ein del utstyr må reingjerast mellom kvar gruppe på 20 personar, derav hoppeslott og tjukkasar.

### **3.4 Påmelding**

Vidare skal arrangøren ha ansvar for smittevern og smittesporing, og må uavhengig av påmelding registrere alle som er innom.

Påmelding for deltaking i Open hall er gjennomførbart, men erfaringa vår er at det krev eit aktivt arbeid og nærvære opp mot ungdomsmiljøet for å byggje ein tradisjon og forståing for å melde seg på aktivitetar. Eit vellukka arrangement med påmelding har gjerne gjennomført dette leddet i sjølve ungdomsklubbane. Denne kontaktflata har vore broten under korona, og er no under gjenoppbygging. Vidare er ikkje Open hall eit tilbod folk er van med å melde seg på, der det elles har vore fritt.

Open hall samlar normalt 300-600 personar. Vi vurderer at påmelding kkje vil redusere den store arrangementstekniske risikoen i stor nok grad. Open hall trekker til seg barn og unge, og det er fare for at det blir samla større folkemengder som ikkje kan komme inn utanfor hallen. Desse vil verte utan oppsyn eller registrering.

### **3.5 Drift og tilsyn**

Normal drift av open hall er relativt slank, der vi har 2-4 aktivitetsleiarar eller hallvertar til stades med omsyn til sikkerheit. Det er normalt at barn under 5. klasse må komme i følgje med vaksne.

For å overhalde smittevernreglane må kommunen som ansvarleg arrangør stille med mange fleire tilsette. Dei tilsette må følgje opp kvar si gruppe, og sørge for overflatereinhold mellom gruppene.

Det var frå før korona planlagt eit omfattande sommaraktivitetstilbod i regi av frivilligsentralane og ungdomsklubbane, for barn og unge i Alver. Grunna korona vart ressursane som var lagt til å drive Open hall i sommarferien styrt inn til dette aktivitetsprogrammet, for å styrke talet på utandørsaktivitetar til erstatning for Open

hall Dersom Open hall skal gjennomførast, må vi tilsette fleire aktivitetsleiarar og medarbeidarar til å organisere desse og føre tilsyn.

### **Rådmannen si oppsummering**

Hallvertar og aktivitetsleiarar som under normale forhold organiserer Open hall tilbodet, er involvert i aktivitetsplanen som kulturavdelinga har lagt til rette for i sommar, med utvida tilbod for born og unge i alle målgrupper.

Eit smittevernreinhold i høve til Folkehelseinstituttet sine retningslinjer inneber ei vesentleg auke av reinholdet i dei aktuelle vekene, ved kontinuerleg reinhold i lokala, på berøringsflater og på materiell. Dei ressursane har ikkje Alver kommune tilgjengeleg i eigne rekker. Det har heller ikkje lukkast å få tilslag frå eksterne firma pga ferieavvikling.

Om lag og organisasjonar er villige til å ta på seg smittevernreinholdet og utføre dette på dugnad, krevs målretta opplæring. Alver kommune vil uansett stå ansvarleg dersom dette sviktar.

Risikoanalysen som AktiMed har bidratt med er klar på kva ansvar kommunen eventuelt tar på seg i Open hall konseptet og kor risikofyllt denne aktiviteten er. Ut i frå smittevernomsyn og kapasitet vil det ikkje vere forsvarleg å gjennomføre Open hall i sommar.

Formannskapet har opna for i hallane frå 27.07.2020 til skulestart. Hallvakter, tilsyn, smittevernreinhold og vaktmeistertjenester vil bli organisert slik at kommunen sitt ansvar blir ivaretatt i denne perioden.